

He Whakatau

Me mātua pānui kia mārāma rawa koe ki ngā whārangi 8–14 o tēnei pukapuka.

He whakarāpopoto

Pānuitia te whakarāpopoto ki te ākonga. Ka pātai atu a Te Rererangi ki tōna whānau, “He aha tō moemoeā i te pō nei?” Kimihia ngā moemoeā i roto i te pukapuka *Moemoeā*.



He kupu whakataki

Kia kaha ki te whakamahi i ngā wheako me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatitina rawa te pūkenga tiro whakamua. Matapakihia ngā kupu hou me te āta whakamahi i te papa kupu, whakairo kupu rānei me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

Whakawhitiwhiti kōrero mō ngā moemoeā me ngā moepapa, me ngā rerekētanga.

Kei te pīrangi te ākonga ki te mōhio ki te kaupapa o ngā moemoeā o ētahi atu, kāore rānei? He aha ai? He aha i kore ai?

He aha ngā kare ā-roto pea o te tangata i te moemoeā ki tētahi mea pai, ā, i tōna ohonga ake, kātahi ka mōhio he moemoeā noa iho.

He Matapaki

Tirohia te pai o te pānui a te ākonga

I te wā o te matapaki, me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e mārāma ana, mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga ki te titiro ki mua, ki te matapae hoki, i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini rīpene kōrero, i tōna kotahi rānei;

- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. He aha te pātai a Te Rererangi ki tōna whānau?
2. He aha ētahi o ngā moemoeā o te whānau o Te Rererangi?
3. Nā te aha rātou i pōuri ai?
4. He aha a Te Rererangi i noho ai ko te mea anake e koa ana he moemoeā noa iho?
5. He aha pea ngā take i moemoeā ai rātou ki ngā mea i roto i ō rātou moemoeā?

Ngā whakautu ki ngā whakapuaki māramatanga

1. I pātai ia, “He aha tō moemoeā i te pō nei?”
2. I hararei a Māmā ki Rarotonga; i mau i a Pāpā tētahi ika nui; i eke a Maioha i te rōnakinaki; i uru a Toihau ki te tīma o Ngā Mangu Katoa; he roa ngā makawe o Hikitia.
3. Nā te mea, he moemoeā noa iho.
4. Ka rerekē ngā whakautu.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

Te pūtake

I He āta titiro ki ngā āhua whakawhiti kōrerorero mai i te pukapuka.

He whakatakinga ā-roto, he whakaharatau

I mua i te pānui i te pukapuka, matapakia te moemoeā me te āhua tūturu o ngā moemoeā. He aha ngā whakaaro pea o te tangata i tōna ohonga ake me te mōhio he moemoeā noa iho.

Kia ōti i te ākonga te pukapuka te pānui, kōrero mō ngā kaupapa i moemoeātia e Te Rererangi me tōna whānau. He aha ngā mōhiohio e riro i a mātou mō rātou mai i ō rātou moemoeā?

Titiro ki te āhua i tuhia ai te kōrero hei rārangi pātai me ngā whakautu.

Kua rongona e te ākonga ētahi moemoeā rongonui?